

Faasoa o le Vaiaso:

Fanau i se siosiomaga malamalama



Tala:
O le mago alofa



Saogalemu o fanau i auata

O se faaaliga mo le mamalu o le aufaitau

Talu ai ni suiga i le auata ua lafoina atu ai le puletini, ua mafua ai ona le maua e sina vaega to'alaiti.

E pei ona silafia, sa masani ona lafo atu i le pdf format, a o lea ua avatu le soo (link) e fesootai ai; pe soo tonu foi i le upega a le OLA (ola888.com) e faitauina ai.

I luga o le upega e maua ai se kopi o le pdf mo e manana'o i le format lea. E maua lea i lalo o puletini tuai 2015.

Ma le faaaloalo tele.



E faalogo mamoe i le leo o le leoleo mamoe lelei. E pei foi ona matauina i foliga o tamaiti o le Iunite Samoa, Masina Vaaia, i Sutton Park Primary i Magele Sasa'e. E foliga ua sauni leni iunite e feiloai atu i soo se luitau o le 2015.

A'oga a Sutton Park: laumua o gagana a le Pasefika a le aai o Magele

Afio mai ma susu mai i le laumua fou o gagana a le Pasefika a le aai o Magele. O loo faafailele ai gagana a le Pasefika auā tupulaga faia'e a le aai, tainane Samoa mo a taeao.

O le Masina Vaaia o le igoa lea o le iunite Samoa a le a'oga tulagalua o Sutton Park i Magele. O le igoa o le tamaitai faia'oga sa ia uluai faatuina.

E 80 le aofa'i o tamaiti o le iunite. E talitonu o le a suia lea numera a o faagasolo le tausaga.

E to'afa faia'oga. O o latou suafa nei: Sapi Neemia, Diana Tuaopepe, Gata Tosogi, ma Saili Aukuso.

E pei ona ta'ua, na amatamea le tamaitai o Masinavaaia Stowers i taimi o pulega a pule papalagi. A o le tausaga talu ai na sui ai le pulega ina ua tofia Faatili Iosua Esera i le tulaga ta'ita'i. Ma faataoto ai loa ni fuafuaga fou mo le auiluma o Sutton Park.

I le fatu o na fuafuaga fou le avea o gagana muamua a le fanau ma taula'iga o vaaiga ma faamamafa i lana silapasi a'oga. E talitonu le alii pule o le ki lea i le manuia ma le siitia o ausiga a fanau i totonu o le aai, o a



Le alii pule, Faatili Iosua Esera, tama ma teine o le Masina Vaaia. (I luga): Sapi Neemia, Gata Tosogi, Diana Tuaopepe

latou gagana muamua ma aganuu.

I le tulai mai o le pulega fou ua toe fuata'iina ai alafua, ma suia fuataga tuai i ni auata fou e pei o le faaogaina o le atagalua o polokalame i gagana e lua e faaopopo lona uiga ae le toese. Lea

ua ave ai le faamuamua i fanau Samoa ma le Pasefika o loo tumu ai le a'oga.

E iai foi lana iunite Toga ma le Maori. Ua sauni Sutton Park e tulituli lana miti, ia avea ma laumua fou malosi o gagana Pasefika a Magele. Sau ia!

*Faasoa o le Vaiaso:***fanau i se siosiomaga malamalama & saogalemu**

O le vaiaso na se'i mavae na faailoa mai ai e le Komisi o Aia Tatau a Tagata e faapea o loo na su'esu'eina ni talosaga se 18 e manaomia ai se faaiuga a lona ofisa. O nei talosaga e auga i le a'oa'oina o le mataupu Kerisiano i totonu o nisi a'oga a le atunuu.

E aofia ai le SEN, o se taupulega, o lona sini o le sufi o le malo ma le aufaitulafono, ina ia soloia tulafono o loo mafai ai ona a'oa'o mataupu lotu i totonu o a'oga.

E tusa ma se 640 le aofai o a'oga a Niu Sila e a'oa'o ai le Mataupu Kerisiano, e faaopoopo i ai mataupu a nisi lotu. Peitai e fulisia a'oa'oga i le mataupu Kerisiano, o se numera o loo fai ifo talu ai le malosi o le tete'e a le SEN ma se vaega o matua, ua mafua ai ona taofia nisi.

O lenei foi vaiaso o le a faailoga ai e ni a'oga le Aso o le Fanau i Niu Sila. O le Aso Sa muamua o Mati i tausaga taitasi ua togia mo lea faamoemoe, e taulai ai le vaai i le taua o fanau o ni measina a nuu ma malo.

E tele itu o le finauga. Muamua, o le itu a Kerisiano o loo finau mo le faaauauina. Lua, o le itu a le SEN o loo finau e soloia ma tafi ese lea faiga mai a'oga uma a le malo. Tolu, o isi lotu o loo finau mo a latou foi aia tatau e amana'ia tutusa ai ma le Kerisiano. Fa, o le itu e manatu e tatau ona a'oa'o talitonuga lotu faatasi ma le mau faasaienisi i le tupu'aga o le lalolagi ma le foafoaga faagasolo o mea uma. Ma isi foi.

O politikai nei o lotu sa faumalo ai le Kerisiano i le pulega o nuu ma malo mai le tele o tupulaga.

I nei aso ua sui foi, ma ua moomia ai foi se tali fou i le taupulega fou.

Lea ua taulamua ai le Malo Afaatasi ma ona lala, e ala i le fu'a tauluga, 'o aia tatau a le tagata.'

I lenei lava foi vaiaso i le tala faasolopito, o le a faamanatu ai e tagata Amerika o tupuaga Aferika le atoaga o le 50 tausaga talu le savali ta'uta'ua mo a latou aia tatau.

I le Aso Sa, aso 7 o Mati, 1965, na laasia ai e se solo tete'e e 600 tagata le auala uamea fesoota'i mai Selma e

faamoemoe mo le taulaga o Montgomery. Ua faaigoa lea aso o le Aso Sa o le Toto (Bloody Sunday) auā na maliliu nisi, ae manunu'a le toatele (e aofia ai ma ni tamaiti a'oga), ina ua osofaia le solo e leoleo a lea atunuu.

E pei la ona molimau le mea na tupu i Selma (taga'i foi i mea na tutupu i lo tatou tala faasolo i lenei vaiaso) e lei faigofie le mauaina o le saolotoga e nisi fanau. Na maua i le toto masaa ma le le faalogologo tiga o matua ma e ua muamua atu. Ua aeae ai nei tupulaga o nei aso i le ositaulaga a i latou na.

E to'atele foi fanau na maua nei aia tatau i ala filemu ma le faigofie. E saoloto e ulufale i a'oga, le lotu ma mafutaga faapena. E au ina galo ai ia i latou mea taua e pei o le ositaulaga, ma isi mea sili na e maua i le olaga faigata.

Ae e le faapena i isi atunuu. Manatua le tala i le tamaitai Arapi o Malala na fana e ona fili ona o le taofi o nisi tagata e le tatau ona a'oga ni teine.

A o le a'oga aupito sili mo le fanau o le malamalama i uiga lelei ma tausafia e ese ai tagata a'oa'oina mai isi.

Muamua, o le talia o isi a latou pa'aga a'oga i o latou talitonuga ma aganuu. Faaaloalo i o latou manatu faalelotu, pe a manao foi e faaaloalo mai i sona taofi.

Lua, ia iloa lelei o latou talitonuga. Sala ina manatua na o mea sili ma le taua: onosai, agalelei, faamaoni, faimeatonu, ositaulaga, o mea taua na. Ae le taua le fesili poo le fea lotu e sao i le lagi.

A iai se isi aia tatau a le fanau e ao ona amana'ia, o le tulaga lea i le saogalemu o lagona ma le ola 'ai tiga ma mafatiaga o le olaga e feagai ai. Se a se mea e fai e taofi ai le pule i le ola o loo aliali mai pea i fanau a'oga?

O a ni tomai o le aufaigaluega e matauina ai ma vave ona itea faailoga o manu'a i le loto ma le agaga? Faapefea ona sufi le faanoanoa o fanau iti ua tuua na o latou ina ua alu le faia'oga e le toe sau—maluu pe alu i se isi a'oga?

O nai fesili faatupu manatu na mo tatou uma i lenei vaiaso.

**“mafauauga o le vaiaso”
E faasaoloto outou e le mea moni—lesu**

Mataupu lotu: auga o le finauga i le va o itu e lua

I le fatu o le finauga i le va o e manana'o e faaauau ma e naunau e teena le mataupu lotu Kerisiano mai le toe a'oa'oina, le Saienisi. O le saienisi e molia i le fesili, O lea fea o itu e lua e faamaoni lana mau?

Fai mai le itu A o le Atua na faia mea uma lava i le lalolagi ma le lagi. E fitu aso na fai ai, e aofia ai ma le tagata le tumutumu o ana galuega. E iai nisi i le itu lenei e manatu na o le ono pe fitu afe tausaga o le matua o le Foafoaga.

I le itu E i latou e talitonu o le lalolagi e le o se foafoaga a se Mataisau a o se fua o se mea na tupu (faaigoa i le mau faasaienisi o le Big Bang theory).

O le tagata se meafaiola e afua mai isi meafaiola faatauvaa na feliuaiina mai i le faitau miliona tausaga o le tala faasolo o le taimi.

Peitai i itu e lua o iai foi le mau vasega o taofi ma talitonuga eseese.

I le itu A e mafuli i ai le toatele o le 'aukerisiano. I le itu E e toatele i e le talitonu i se Atua na ia faia mea uma, vaaia ma le mavaaia.

Lea e iai le faalapotopotoga a le SEN, o loo tu mo aia tatau a i latou nei.

O le SEN o loo finau mo le vavao e faagata ai ona toe a'oa'o soo se mataupu tau lotu i totonu o a'oga a le malo. O la latou mau, e solitulafono nei faiga, talu ai o le lotu o le mea e patino i le tamaitiiti ma lona aiga. E le tatau ona faaoga meatotino a tagata lautele e tali ai na o mana'oga o Kerisiano.

O iai foi matua o loo finau mo le tatau ona faamalosi le a'oa'oina o le mau faasaienisi i le tupuaga o mea uma. Latou te le talia se fagogo faaEperu i se foafoaga e fitu aso na fausia ai.

Ua tuua'iina foi le Itu A i le monoti faamalosi o ana talitonuga i tamaiti. E 18 ni moliaga e aofia ai i latou ua tuua'iina i le tala'i atu o o latou taofi ma le faamoemoe e maloina mai ai tagata i la latou lotu.

O loo talia nei se tali a le Komisi o Aia Tatau i nei talosaga. O le a mataitū ma le toto'a sana faaiuga.



Ripoti o le Vaiaso:

Tulaga saogalemu o fanau e le na o turisi e tuuaina

E leai se feau sili ona malosi lona tala'iina e le Matagaluega o Leoleo i lenei lava taimi nai lo le tulaga saogalemu i luga o ala tetele a le atunuu.

O se feau na toe faamamafaina i se saunoaga a le fofoga o le matagaluega i le maliliu lata mai o se aiga, ona o le faatamala o ni tagata tafafao mai fafo.

Ua faaalua ai le popolega o matua ma pulea'oga i lenei tulaga ma sona aafiaga mo fanau o loo fa'aaogaina auala faitele e femalagai ai mai fale i a'oga i aso taitasi.

Ae na saunoa se tina Samoa e iai sana fanau a'oga laiti e faapea, e peiseai e mamafa le tuuaiga o tagata tafafao mai fafo i faalavelave tau auala. A o lana mau, e sili lava le faaletonu o loo tulai mai i totonu o lo tatou lava lotoifale.

Faaalia e le tina ua vaai lava i ai i le aveave a nisi, ma e ofo i le matutua o nisi avetaavale, ae e leai ma se fuafua o le saosaoa o le o a taavale, aemaise lava i vaega e lata i kolosi ma nofoaga o a'oga.

Na fesiligia le tina pe aafia ai nisi o tatou (Samoa) i lea tulaga. O lana tali, "Aua, e toatele foi si tatou vaega e lavea ai."

Fai mai na faalala lona limatusi i lona muaulu e faatonu ai se tamā (foliga o so tatou) na alu loa le taavale i le kolosi a o loo tutu ma ona alo e sauni e laasia laina papa'e.

Na 'ata mai le tamaloa ia te ia e foliga e le salamo i lana mea ua fai, a o ia ua tumu i le ita.

E le iloa la pe 'ata pe a lafo i ai e leoleo sana sala auā na tusi lelei e le tina le numera o le taavale.

"Vaai foi i la'u peni lea ma la'u tama'i api, o lana tala lea. Ou te feelua'i lava ma a'u. Na o le sese lava o le taavale, tusi i lalo le numera o le peleti."

O le mea e ofo atili ai le tina, ona e vaai atu i le taavale a le tamā lea, o loo tuu mai ai ni tamaiti a'oga. O lona



uiga o lana fanau a'oga, 'ai o alu e tuli le taimi o le a'oga, ae tuu ai isi fanau i se tulaga lamatia, saunoa le tina.

O se masani e le fuatasi i se vaiaai a o loo tupu i soo se nofoaga, saunoa pea le tina.

E faamaonia lava lea manatu e sui o lenei puletini. I le auala o Roscommon i Manurewa e molimauina ai lona faamaoni.

O loo tatou talanoa i le fasiuala lea i le va o Moncrieff Ave ma Burundi Ave e lata i le aai faatau o Clendon. Muamua, e foliga e faatali tamaiti ma matua se'i pasi taavale ona faato'ā kolosi lea.

E mafua lea auā e fai si saosaoa tele o le o a taavale. E iloa mamao atu lava i 'o le sau a le taavale o loo sauni e tu ma le taavale e musu e faatali i se isi.

O le popolega, o fanau laiti e uia le kolosi na o latou.

Afai o loo a'oa'o i le potua'oga e pule tagata savavali i le kolosi, e ono laasia e i latou nei laina ma tupu ai se faalavelave.

Ua matauina soo, e iai tamaiti e te'i lava ua kolosi faafuasei. Faapea lava le avetaavale o loo savali sa'o i luma ae te'i lava ua liliu ma laasia loa le kolosi. E taofi atu le taavale ua tuai.

Ae iai foi isi e tutu lelei se'i tu lelei le taavale ona faato'ā kolosi lea.

I le kolosi lava lenei e vaelua i le mutia. E aga'i mai taavale mai le tasi itu e o i Manukau ae aga'i atu isi e o i Weymouth.

O le mea o loo tupu, e kolosi e tamaiti le auala muamua, ona motu lea ae faatumu e le auala sima ma le mutia, ma toe fuafua foi le kolosi lona lua.

O le mea o loo matauina, e tuli mai e isi taavale le avanoa lea, a o kolosi e tamaiti le auala muamua poo lona lua

foi. E 57 ni faalavelave na tutupu i luga o Roscommon i le va o le 2006–2010.

E le o maua se faamau pe sa tupu muamua se faalavelave i lenei kolosi, ae a fua i le tulaga o molimau vaaia, e tataua ona popole matua i le tuu na o fanau e uia lea kolosi na o latou.

O le kolosi lava lea na aafia i se feto'aiga laitiiti i le Aso Faraile na se'i mavae i le manava o galuega. Na so'a e se tasi taavale le keli o le isi taavale

na tu ae se'i kolosi le au savavali. Na'o taavale na leaga ae e le'i aafia se isi.

O le kolosi lenei e ui ai tamaiti e a'o'oga i ni a'oga se tolu lata ane, Roscommon Primary, Finlayson Park, ma Rowandale.

E faapena foi se mea na vaaia i se tasi vaega pisi o Magele. O se tamā foi ua fai si matua, e lei taofia lana taavale i moli i le taimi ua sauni le ausavavali e kolosi.

O nisi o auala e aafia i le lisi o auala aupito matautia i Niu Sila e maua lea i totonu o Aukilani. E lavea ai Ti Rakau, Cavendish, ma Roscommon i le itumalo i saute.

O le tele o faalavelave tau taavale e mafua ona o le saosaoa. O loo mafuli le tele o faalavelave tutupu i luga o auala tetele e lua, le Great South Road ma le Great North Road.

Lapata'i leoleo i le mana'omia o le faautauta i taimi uma. O le tele o faalavelave e tutupu i le taeao i taimi tonu a o gasolo le fanau i le a'oga, ae faapena foi i le afiafi a o tuua mai se vaega o le fanau mai a'oga.

O le mafuaaga, o le naunau e tuli le taimi o galuega poo le a'oga ae fanau mai ai le faalavelave ma faanoanoaga.

E faapena foi se lamatiaga malosi mai turisi tafafao i totonu o le atunuu.

O loo ua malosi le valaau mo le saunia o se su'ega e su'e ai i latou, e iloilo ai le agavaa tataua, ma taofiofi ai le tulai mai pea o faalavelave tuga i luga o auala.

Na saunoa le minisita o auala ma felaua'iga, o loo ua tilotilo nei le malo i ai.

E 47 na maliliu i faalavelave tautaaavale i le amataga o le tausaga lenei. E 23 ia lanuari ae 24 ia Fepuari, molimau mai faamau a le NZ Transport Agency.

E 4 ni tamaiti e aafia ai, i lalo o le 14 tausaga le matutua. E mafuli le aufeoti i avetaavale.

O le mago alofa

~ o se tala i le alofa faamatua ~



I aso ua leva lava sa iai se mago. E ese le telē o lenei mago. Sa tu i tua o le fale o se aiga.

E masani lava ona alu i ai se tama itiiti e ta'alo ai i lalo o lona paolo. E taaalo foi ma le mago. E 'a'e i luga o ona lala, e taupe ai. E nofonofo ai ma usu sana pese pe fai sana tauloto.

E tau foi e ia se fua o le mago ma 'ai. A le lavā ona alu ane lea ua moe i lalo o lona paolo.

Sa alofa tele o ia i le mago ae faapena foi le mago ia te ia.

Ae na alu aso, ua matua o ia, ua le toe alu foi e vaai le mago pe taaalo ma ia.

I le tasi la aso na alu ai le tama i tua o le fale, ae te'i ua valaau mai le mago, "Sau ta ta'a'alo."

Ae tali atu le tama, "Ua uma aso na o lo'u tama itiiti, ua ou le toe fia taalo i se laau. Ou te mana'o i ni meata'alo mao'i. Ou te fia maua ni tupe e faatau ai."

"Ia, malie e leai ni a'u tupe, ae mafai ona e alu e faatau uma o'u fua suamalie e maua ai le tupe," o le tala lea a le mago. Na fiafia tele le tama. Na alu nei ua tae fua o le mago ma alu loa i le faatau.

Ua tele ana tupe ma ua fiafia tele le tama i ana meata'alo na faatau ai.

Ae pagā lea, ua le alu se'i faafetai i le mago, ua faanoanoa lava le mago.

Ua alu aso ua avea le tama ma se tamaloa.

I le tasi aso na valaau mai ai le mago, "Alii, sau ta taaalo."

Ae tali le alii, "E leai so'u taimi i ni taaloga a ni tamaiti. E te le o tilotilo mai ea o lea ou te pisi!"

Ua atili ai le faanoanoa o le mago.

Ona fesili lea i ai i le tamaloa, "Ae o le a le mea e te pisi ai? Ta'u mai pe mafai ona ou fesoasoani atu!"

"O lea e tau faaputu se tupe e fai ai se fale mo lo'u aiga," tali le tamaloa.

"Sau e tatipi uma o'u lala e fau ai le tou fale," o le upu lea a le mago.

Ua faapena foi ona fai, ua alu ane le tamaloa ua ta uma lala o le mago ua fau ai lo latou fale.

Peita'i e le'i toe alu ane e faafetai i le mago. Ua atili faanoanoa ai le mago.

Ua alu nisi aso se tele. Ua avea nei le tamaloa ma se toeaina matua.

I le tasi aso na savali ane ai i autafa o le mago. Ua valaau ane foi i ai le mago, "Alii, sau ia se'i ta talanoa."

Ae tali le toeaina, "Ou te iloa foi le mea lena e te mana'o ai. Fai atu foi ou te le fia ta'alo. E le o a'u o se tama itiiti. Ua ou matua. E tele mea ia ou te mafaufau i ai."

Ona fesili lea o le mago, "Ta'u mai poo a na mea e te mafaufau i ai?"

"O lea e tau saili se laau e ta ai so'u vaa ma te folaulau ai ma si o'u toalua." Ona tali atu lea o le mago, "Ia, sau e fa'aaoga lo'u tino e fau ai lou vaa."

Ua faapea foi ona fai. Ua o mai tagata ua tatuu i lalo le mago ma fau ai le vaa o le toeaina.

Ua fiafia tele le toeaina i lona vaa, ua o ai nei ma lona toalua e folaulau.

Ae pei lava o le tala ua masani ai, e lei alu foi e faafetai i le mago i lana mea lelei na fai mo ia.

Ua tele lava aso ona toe alu ane lea o le toeaina e vaai le mago.



E alu ane ua toe o le tafu'e o lo tu mai. Ua tagi le toeaina ma faapea lana tala, "La'u uo e, ua lata mai le oti." Ae tali mai le mago, "Ia e malie ua leai se fua suamalie mo oe."

Ae tali atu le toeaina, "E le afaina, ua le toe iai ni o'u nifo o totoe. Pau le mea ou te mana'o ai o le fia taoto i lalo ua lagona le vaivai."

Ae fai mai le mago, "Nofo mai i lalo. Faalagolago mai i lo'u tafu'e."

Ona nofo ifo lea i lalo o le toeaina, ua faalagolago atu i le tafu'e o le laau. Ua lagona e le mago lona fiafia.

Tamaiti, o se tala lenei mo tatou uma. O le mago o le faatusa lea o o tatou matua—poo matua foi o o tatou matua.

I aso a o tatou laiti tatou te naunau e taaalo ma fiafia faatasi ma latou. Ae ina ua tatou matutua ua ese foi mea tatou te naunau i ai. Seiloga lava tatou te manaomia le fesoasoani, pe tele o tatou faafitauli, ona tatou o foi lea e vaai. E le uma lo tatou faiaso ia I latou.

Ae e le suia ai lo latou alofa ia i tatou.

Ua uma le tala.

O SE SOLO I LE MAGO MA LE MANA'O

Tatalo a le tama itiiti

**Mago e, pula ve'ave'a e,
Ua e soona aulelei mai;
O a'u o se tama e le iloa pe'a
Ae ou te alofa tele ia te oe.
E a le tonu?
E sili lou pa'ū mai nei loa
Aua lava e te faatuai,
Ne'i e pa'ū ifo ua ou leai;
Ae e mala ai i le fuia toeaina
Lē taele lele e tutu mai.**

**Faitalia a'u ona sapo lelei oe,
Ma fa'aaoga oe ma le alofa.**

Faailoaga: Tala faavae: Goret Kristina Naslund;
toe faamatala e le OLA. Solo: © OLA 2015

Sponsored by Evaleon Books

LOU TALA FA'ASOLOPITO SAMOA HISTORY

"Ne'i meaane ua galo"



1—7 Mati

- 01
1938 Aso Soifua, Ao o le malo Samoa, Tui Atua Tupua Tamasese Efi, aulia 77
- 02
1994 Savali tetee Tumua ma Pule i le VAGST
- 03
1930 Fono le malo ma sui o le Mau e 50. Tuu atu e Allen (Aleni) i le Mau se lisi o poloaiga
- 04
2011 Faiga Palota a Samoa. Tu Malo le HRPP, maua nofoa e 36. Tautua Samoa 13. Faaauau Tuilaepa tofi palemia
- 2001 Faiga Palota. Tu malo le HRPP, 23 nofoa
- 1934 Molia Taisi OF Nelson faaauunua i Aukilani
- 05
1985 TNS. Ueligitone. Faavae le ulua'i A'oga Amata

Samoa i Niu Sila

- 1973 Tofia Pio Taofinuu i le kolisi a Katinate—Lotu Katoliko
- 06
1951 Faavae ulua'i Au a Teine e Misi Eteuati i Malua; Tooa Salamasina FA avea ma ulua'i peresetene
- 07
2011 Tauto Mata Keli Tuatagaloa o le ulua'i tama'ita'i i le tofi faamasino faaitumalo
- 1967 Amata tautua a le Au o le Filemu (US Peace Corps) i Samoa
- 1960 Tatala femalaga'iga a le Polenisia i le va o Apia ma Pago Pago
- 08
1995 Tatala Maota Gasegase Malietoa Tanumafili II i Tuasivi, Salafai
- 1928 Le manuia taumafaiga a leoleo e pu'e Tupua Tamasese

hrpp: 36 tausaga umia le pule



I le tausaga lenei e atoa ai le 36 tausaga o le umia e le HRPP o le pule e pulea ai Samoa o se malo temokarasi. Na o sina taimi na sasao ai le tuumuli a o lenei ua na o le se'e aga'i i luma, ma e le iloa poo afea ae pe faapefea ona toe taofi mai.

Saunoa lona ta'ita'i ina ua siligia e uiga i le malosi umi o le HRPP e faapea, ua matua ma malosi le HRPP, e foliga e fai mai ua lava le potomasani e ta'ita'i ai. I le itu i le lagolago a le aupalota, o lana mafuaaga, o le talimana'o o le pati e ala i le atiina a'e o le atunuu i ona totoga masani e tua i ai. Ua iai auala galue, fale, atina'e e gaosi ai le tamaoaiga ma alamanuia, ma auala e faatupuina ai. E pei foi o le auala o loo taumafai e faatu mai e ala i le tulafono, e mafai ai ona gasolo atu i latou e iai tupe e faafaigaluega i totonu o le atunuu. Ua siligia i nisi suiga sa fai—ma le malosi o faitioga ma tuua'iga—ona aiaina le faatuatuaga o le aupalota i le ta'ita'iga a le HRPP.

Faatasi ma lona maopoopoga, o mafuaaga uma na e faamatalaina ai lona malosi umi i totonu o le maea faaupufai a le atunuu.

O popolega i le tulafono Sitiseni e pei ona faaleoina e le Itu Agai, e manatu o le tofotofoga aupito sili lea ua feagai nei, e tofotofoga ai le mausali o le faatuatua o le aupalota.

Afai ae sao mai ai le HRPP i le faiga palota o loo loma nei, o se molimau aupito malosi lena e faamaonia ai le mau: e le o luagia le talitonuga o le aupalota. O lona uiga foi, e umi le saasaa a le alii palemia o loo se'ei mai nei.

Faamatalaga Ata i luga: Ata o le Ao Mamalu o le Malo Samoa, Tui Atua Tupua Tamasese Efi, ma le palemia o Samoa, Tuilaepa Sailele Malielegaoi, i sana sausaunoaga.

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. NIUPAC 2014

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING



Telefoni (09) 269-6186. Emeli: evaleon.books@gmail.com

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.

Sponsors:

New Zealand Lottery Commission

Evaleon Books & Niupac Publishing



UILI FAU UPU

Saili tali o fesili o lo'o i lalo. Pule oe pe sipela i luma (clockwise) po'o tua (anticlockwise). E sa le feosoosofa'i.



1. Ta'u mai ni soa se tolu o le upu *mua* i le Igilisi:

2. Saili ni fausaga o le upu *fai*

3. Su'e le upu *fa'ita* ma tusi se faamatalaga:

4. Tusi uma upu/ fuiupu e ta'i 4-8 mata'itusi, ma o latou soa i le Igilisi (English). (E faitau ai ma upu ua ta'ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

SUDOKU #05 (TAALOGA I NUMERA)

	6			7			3	
5		7	6		1	4		9
	4			8			1	
		2	7		4	1		
	5	1		2		7	4	
		3	9		6	5		
	1			9			5	
2		5	3		7	8		1
	3			6			7	

Fa'atumu pusa numera (tama'i sikuea) i fuainumera 1 i le 9. Ia uma ane le galuega ua maua atulaina ta'itasi (tu, fa'alava) o iai le 1 i le 9. E tofu le atulaina ma lona fa'atulagaga e ese mai le isi.

FAIGOFIE / FEOLOOLO / FAIGATA

©sudokuessentials

TALI GALUEGA OLA 4

UILI FAU'UPU 4

1. polo—to cut a fish open; polo — knife; polo—ball
2. olo & ona fausaga: oloina, ologa, oloa, feolo, oloolo, feologa
3. poloaiga (nauna). O se faatonuga, o se tulafono e tatau ona tausii. Ft., *Ua uma ona fai le poloaiga a le taulaga i le faaotaota i nofoaga faitele.* Soa i le gagana Peretania: order, bylaw

4. polo—refer 1; poloa'i—message; poloa'i—to order; aiga—family; aiga—feast; agia—blown; oloa—goods; oloa—teeth; mnf.

TALI SUDOKU #4

5	8	2	1	3	4	7	6	9
1	9	7	2	5	6	3	4	8
3	4	6	7	8	9	1	2	5
2	1	3	4	7	8	5	9	6
4	5	8	6	9	1	2	3	7
7	6	9	5	2	3	8	1	4
6	7	1	3	4	5	9	8	2
8	2	4	9	1	7	6	5	3
9	3	5	8	6	2	4	7	1

Ross Taylor: Faamatalaga sa'o E sa'o uma faamatalaga ae sese le 'E tausoga ma Tiger Wood'.



TALI PASO #4

M	U	M	U	A	M	A	U	G	A
A	A	L	I	O	T	G			
S	I	S	I	L	A	U	G	A	
E	E	P	A	I	A	S			
F	E	I	T	A	M	A	L	O	A
A	G	P	I	A	I	L			
U	L	A	F	A	U	A	I	N	A
E	I	A	O	A					
T	A	U	S	I	L	I	U	O	
G	O	I	S	L					
P	A	O	T	A	M	A	F	A	I

© PasoSamoa

PASO I GAGANA E LUA

Faatumu le paso i upu/igoa Samoa. Fill the crossword box with **Samoaan words /names** —unless stated otherwise.

1		2		3		4		5		6
				7						
8						9				
				10						
11						12				
				13						
14	15		16			17	18		19	
						20				
21								22		
								23		
24				25						

Faalava~Across

- 1 to describe a good quality fine mat (5)
- 4 building (verb) (5)
- 7 to pick breadfruit (3)
- 8 separated (5)
- 9 speech (5)
- 10 siblings (3)
- 11 mackerel (fish) (5)
- 12 animals roaming (5)
- 13 Fagogo: Tala ia Leu ma __ (3)
- 14 earthworm (5)
- 17 lament (5)
- 21 ideal lady (7)
- 22 miserly (3)

24 beat of a music (3)

25 village chiefs (5)

Lalo~Down

- 1 scenery (7)
- 2 subject, case (7)
- 3 main road (7)
- 4 turn against (7)
- 5 enter (7)
- 6 beginning (7)
- 15 art of making 'lega' (turmeric powder) (5)
- 16 slice skin off (4)
- 18 mate (2)
- 19 move (5)
- 20 men's shirt (4)
- 23 taboo (2)

Su'esu'ega: Vaai lau Tusi Paia. Iloilo poo fea faamatalaga e sa'o e faatatau i le poloaiga a Paulo ia Timoteo (1 Timoteo 5 f. 23)



- inu sina vaiauli e te'a ai lou ma'i.
- toaga e inu au fualaa
- toaga e tatalo e te'a ai
- alu e fai sina savali
- tuu le vaiauli ae inu sina uaina

POLE MA PAPA



Sole, o fea la e oso mai ai Eva ia?